

# Wosebita šansa za serbšćinu

**Wojerecy** (SN). Diskusijny wječork wo móžnym wažnym rozšěrjenju serbsko-rěčneho poskitka je srjedu, 19. junija, we 18 hodź. w bróžni na zahrodže domu Domowiny we Wojerecach na Drježdźanskej dróze 18. Na njón přeprašatej Wojerowska župa „Handrij Zejler“ a kubłanski wuběrk Serbskeho sejma.

„Při rozsudže za druhu cuzu rěč w 6. lětniku móhli šulerjo hišće wosebitu šansu dóstać serbšćinu nawuknyć. To by aktraktiwne było, njeby-li přidatnu prócu porno tym šulerjam woznamjenjało, kotřiž sej hinašu rěč wupytaja. Tale wosebita šansa, powjetšić ličbu serbšćinu rěčacych a wutworić nowe rěčne rumy, njebu dotal wužiwana. Wona móhla wažny stołp rewitalizacije rěče być“, wuswětla dr. Měrcin Krawc, iniciator a člon ku-

błanskeho wuběrka Serbskeho sejma. „Zdobom njesmědža tajke poskitki na kóšty posrědkowanja rěče we wysokej kwaliće na serbskich šulach hić“, wón dodawa.

Wojerowski župan Marcel Brauman widži wosebje w srjedźnej Łužicy wulki, dotal njewotkryty potencial a by ideju, za kotruž je so Wojerowske župne předsydstwo wuprajiło, rady zwoprawdźenu měł. Wučerjo, šulerjo, starši a wšitcy na wožiwjenju serbšćiny zajimowani su wutrobne witani so na diskusijnym wječorku wobdźělić a sej mysle wuměnjeć, kotre šansy a problemy su wočakować a kajke by wurunanje mjez wšelakimi woprawnjenymi zajimami bylo.

Wječork wotměje so z hornjoserbsko-němskim simultanim přeložkom.